

180 posts da lavur en il parc d'industria a Domat


Sairada da la fracziun burgais-democratica a Vial-Tuleu a Domat

■ (mc) La Partida burgais-democratica dal Grischun ha envidà dacurt ad ina sairada da fracziun che ha gi lieu en las novas localitads da l'interpresa Hamilton a Domat. Cusseglier guvernativ Jon Domenic Parolini ha referi davart il svilup e las sfidas dal Grischun sco lieu d'economia. Il nov candidat da la pbd Andreas Felix ha preschentà sia incumbensa per l'elavraziun d'ina strategia integrala da furmaziun ch'el ha inoltrà dacurt a la regenza. L'interess è stà grond cura che la fracziun burgais-democratica ha envidà a la sairada tradiziunala da fracziun cun l'assistenza da numerus giasts. Tant anteriurs sco mandataris activs han dà suatientscha a l'invit da sa radunar al nov domicil da la Hamilton a Domat. Tranter ils giasts sa chattava era cusseglier naziunal *Martin Landolt*, il parsura da la pbd svizra.

Il bun exempel per il svilup economic en il Grischun

Il schef dal departament d'economia e socialesser, cusseglier guvernativ *Jon Domenic Parolini*, ha taxà il parc d'industria Vial-Tuleu sco bun exempel per il svilup economic en il Grischun. «Là nua ch'i deva anc avant curt temp in desert vegnan prest a lavurar 180 persunas.» E quai saja pir il cumenzament. Pertge il svilup economic en il Grischun saja legraivel. Suenter dus onns difficils 2015/2016 haja era la conjuntura en il Grischun senti dapi l'onn passà l'effect d'in svilup economic positiv tant en Svizra sco en l'exteriur. Era per 2018 possian ins quintar cun in creschament, ha ditg Parolini.

Il minister d'economia che fa part dapi 2015 da la regenza grischuna è dentant era conscient da las sfidas dal futur. Il svilup demografic, la calamita da las aglomeraziuns dals centers urbans, il cumbat per talents e las vieutas radicalas sin il martgà da lavur en connex cun la digita-



La sairada tradiziunala da la fracziun burgais-democratica ha gi lieu quest onn en las localitads novas da la Hamilton a Domat. MAD

lisaziun sforzian da tschertgar novas soluziuns. Cun sustegnair infrastructures relevantas per il sistem, il program turistic 2014–2021, la promoziun da l'innovaziun e dal svilup da lieu haja il chantun gia interprendi bler per pudair influenzar quest svilup a moda positiva.

Il parc d'industria Vial-Tuleu, ina istorgia da success

In'istorgia da success saja per exempel il parc d'industria Vial-Tuleu. L'avertura dal parc d'industria progredeschia tenor program ed er ils custs sa muntian en il rom dal budget. Per Parolini èsi stà impurtant da pudair metter a disposiziun quest areal per l'economia. Tras la reali-

saziun dal stabiliment da la Hamilton cun radund 180 posts da lavur portian questas stentas gia ils emprims fritgs.

Satisfats da la buna collavuraziun cun la regenza e cun l'andament positiv da l'interpresa èn er ils represchentants da l'interpresa Hamilton. Ils emprims collavuraturs hajan gia preni possess da l'edifizi nov la fin da mars. Fin la fin da quest onn vegnian quai la finala ad esser radund 180, sa legra *Martin Freiy*, il commember da la direziun e vicepresidente da la Hamilton Storage GmbH. Il svilup rasant da l'interpresa saja dentant er ina sfida. Uschia la tschertga da persuonal qualifitgà, di *Björn Gerhard*, il manader dal team Leader Talent Develop-

ment. «La purschia da la scolas autas dal Grischun na satisfan deplorablamain betg als basegns dals manaschis economics dal Grischun, manegia Gerhard.

Ina strategia da furmaziun integrala cun resguardar l'economia

Er il candidat burgais-democrat per la regenza grischuan *Andreas Felix* dat en la medema crenna. Gia avant dus onns ha Felix pretendi en ina incumbensa inoltrada a la regenza che l'elavraziun d'in concept integral da furmaziun e perscrutaziun haja prioritad, stoppia esser integrala e vegnia preni per mauns immediatamain. «Tant l'economia sco las instituziuns da furmaziun existentas èn d'inte-

grar en quest process», punctuescha Felix.

Tant la realisaziun instradada da la regenza en etappas e cun numerus resalvas sco las intenziuns strategicas formuladas en il program guvernamental 2017–2020 tegnian quint memia pauc da las sfidas economicas futuras da noss chantun. Ils sequents puncts pretendian ina strategia integrala da furmaziun e perscrutaziun:

- En cooperaziun cun la scola auta specialisada da la Svizra orientala intensivescha il chantun S. Gagl ina direziun autonoma cun cooperaziun marginala dals ulteriurs chantuns e de facto senza il Grischun. Per la HTW a Cuira exista il privel da vegnir marginalisada.

- Cun la disponibladad da l'areal da l'antieriura resgia industrial a Domat disponia il chantun d'in potenzial considerabel per la diversificaziun cun ina ferma basa en l'economia grischuna. Quest avantatg sto vegnir tratg a niz era per la politica da furmaziun.

- Il svilup demografic degressiv da la populaziun periclitoschia l'existenza da las scolas professiunalas, da las scolas medias e d'ulteriuras instituziuns da furmaziun cunzunt en las regions. La concorrenza sfrenada e senza concept per gudagnar scolars e students mettia la finala en privel tut las instituziuns engaschadas sin il sector da scolaziun e furmaziun. Ina strategia da furmaziun sto perquai resguardar tut il stgalims da noss sistem da furmaziun.

La disponibladad da forzas da lavur qualifitgadas e la vischinanza cun las instituziuns da furmaziun èn facturs elementars da l'attractivitat dal lieu sco domicil per interpresas. Las purschidas da furmaziun e lur qualitat ston prender dapli resguard dals basegns da l'economia, punctuescha Felix.

In'incumbensa correspudenta da Felix è vegnida inoltrada a la regenza gia en la sessiun dal favrer da l'onn 2016.